

«30» հոկտեմբերի 2020թ.

ք. Երևան

ՀՀ պետական եկամուտների կոմիտեի իրավաբանական վարչության պետ Ա.Մնացականյանս, քննելով Վաչագան Քոթանջյանի անվամբ ՌԴ-ից ՀՀ բեռ տեղափոխած, 007FF17/007F17 հաշվառման համարանիշի բեռնատարի վարորդ Պետրոս Լյովայի Պետրոսյանի վերաբերյալ նյութերը.

Պ Ա Ր Զ Ե Ց Ի '

2020 թվականի սեպտեմբերի 29-ին ՀՀ ՊԵԿ Արարատյան մաքսատուն-վարչության աշխատակիցները «Ուրբան Լոջիստիք Սերվիսիս Տերմինալ» ՓԲ ընկերության մաքսային հսկողության տարածքում զննության են ենթարկել Վաչագան Քոթանջյանի անունով ՌԴ-ից ՀՀ ներմուծված, այնուհետև Բագրատաշենի մաքսային կետ-բաժնում լրացված թիվ 05100033/200920/0038086 տարանցման հայտարարագրով հայտարարագրված ապրանքները:

Զննման արդյունքում պարզվել է, որ թիվ 05100033/200920/0038086 տարանցման հայտարարագրում նշված 9254 կգ քաշի փոխարեն փաստացի առկա է 16840 կգ օգտագործված անձնական իրեր և 1160 կգ քաշով անձնական օգտագործման ավտոմեքենա:

Փաստի առթիվ Պետրոս Լյովայի Պետրոսյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

Մաքսային զննման ակտով հաստատվել է, որ թիվ P0145670 մաքսային ապահովման միջոցը եղել է անվնաս, ինչից հետևում է, որ 007FF17/007F17 հաշվառման համարանիշի բեռնատարի անթափանցելիությունը խախտված չի եղել:

ԵԱՏՄ մաքսային օրենսգրքի 2-րդ հոդվածի 26-րդ կետի համաձայն՝ «փոխադրողն» այն անձն է, որն իրականացնում է ապրանքների և (կամ) ուղևորների փոխադրում (տրանսպորտային փոխադրում) Միության մաքսային սահմանով և (կամ) մաքսային հսկողության տակ գտնվող ապրանքների փոխադրում (տրանսպորտային փոխադրում) Միության մաքսային տարածքով:

ԵԱՏՄ մաքսային օրենսգրքի 142-րդ հոդվածի համաձայն՝ «Մաքսային տարանցում» մաքսային ընթացակարգը կիրառվում է Միության մաքսային տարածքով, ինչպես նաև Միության անդամներ չհանդիսացող պետությունների տարածքներով օտարերկրյա և Միության ապրանքների փոխադրման համար:

ԵԱՏՄ մաքսային օրենսգրքի 107-րդ հոդվածի 1-ին մասի համաձայն՝ տարանցման հայտարարագրում նշվում են հետևյալ տեղեկությունները՝ հայտարարատուի, փոխադրողի մասին, ապրանքներն ուղարկող երկրի և նշանակման երկրի մասին, այն տրանսպորտային միջոցի մասին, որով տեղափոխվում են ապրանքները, ապրանքների անվանման, քանակի և արժեքի մասին՝ տրանսպորտային (փոխադրման) փաստաթղթերին համապատասխան ապրանքների ծածկագրի մասին, ապրանքների համաքաշի կամ ծավալի մասին, ինչպես նաև ապրանքների քանակը՝ արտահայտված չափման լրացուցիչ միավորներով և այլ տեղեկություններ, իսկ 111-րդ հոդվածի 8-րդ կետի համաձայն՝ գրանցման պահից մաքսային հայտարարագիրը դառնում է իրավական նշանակություն ունեցող փաստերի մասին վկայող փաստաթուղթ:

ԵԱՏՄ մաքսային օրենսգրքի 302-րդ հոդվածի 3-րդ մասի համաձայն՝ Միության ապրանքները Միության անդամներ չհանդիսացող պետությունների տարածքներով Միության

մաքսային տարածքի մի մասից Միության մաքսային տարածքի մեկ այլ մաս փոխադրման համար ենթակա են «մաքսային տարանցում» մաքսային ընթացակարգով ձեւակերպման:

ԵԱՏՄ մաքսային օրենսգրքի 83-րդ հոդվածի համաձայն «մաքսային տարանցում» մաքսային ընթացակարգի հայտագրման դեպքում որպես հայտարարատու կարող են հանդես գալ փոխադրողը, այդ թվում նաև՝ մաքսային փոխադրողը, առաքողը, եթե նա Մաքսային միության անդամ պետության անձ է: Օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ հայտարարատուն պարտավոր է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր, իսկ 3-րդ կետի համաձայն՝ հայտարարատուն, Մաքսային միության անդամ պետությունների օրենսդրությանը համապատասխան, պատասխանատվություն է կրում 84-րդ հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ ներկայացնելու, ինչպես նաև մաքսային ներկայացուցչին անվավեր, այդ թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

ԵԱՏՄ մաքսային օրենսգրքի 308-րդ հոդվածի 1-ին կետի համաձայն՝ Միության անդամներ չհանդիսացող պետությունների տարածքներով Միության մաքսային տարածքի մի մասից Միության մաքսային տարածքի մեկ այլ մաս Միության ապրանքների փոխադրման դեպքում փոխադրողը, անկախ «մաքսային տարանցում» մաքսային ընթացակարգով ձեւակերպված ապրանքների հայտարարատուն լինելու հանգամանքից, պարտավոր է. ապահովել ուղարկող մաքսային մարմնի կողմից սահմանված ժամկետում ապրանքներն ու դրանց փաստաթղթերը հասցնել ապրանքների առաքման վայրը, ապահովել ապրանքների, մաքսային կապարակների, եւ կնիքների, կամ նույնականացման այլ միջոցների պահպանվածությունը: Թույլ չտալ ապրանքների բեռնաթափումը, փոխաբեռնումը (վերաբեռնումը) եւ դրանց հետ կատարվող բեռնային այլ գործողությունների իրականացումը, ինչպես նաեւ այդ ապրանքները փոխադրող տրանսպորտային միջոցների փոխարինումը Միության անդամներ չհանդիսացող պետությունների տարածքներում՝ առանց ուղարկող մաքսային մարմնի թույլտվության:

ՀՀ Մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ Մաքսային օրենսգրքի 203-րդ հոդվածի 1-ին մասի 1-ին պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում չի առաջանում մաքսային վճարների (բացառությամբ մաքսավճարի) պակաս հաշվարկում կամ չհաշվարկում, ինչպես նաև ոչ սակագնային կարգավորման

միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ 50 հազար դրամի չափով:

Պետրոս Պետրոսյանը 2020 թվականի հոկտեմբերի 30-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար, սակայն վերջինս չի ներկայացել, միջնորդություն չի հարուցել, առարկություն չի ներկայացրել:

ՀՀ մաքսային օրենսգրքի 219-րդ հոդվածի 2-րդ մասի համաձայն՝ գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Գործի քննությունը կատարվել է նրա բացակայությամբ՝ հիմք ընդունելով ՀՀ մաքսային օրենսգրքի 219-րդ հոդվածի 2-րդ մասը:

Այսպիսով, նյութերով պարզվել է, 2020 թվականի սեպտեմբերի 29-ին ՀՀ ՊԵԿ Արարատյան մաքսատուն-վարչության աշխատակիցները «Ուրբան Լոջիստիք Սերվիսիս Տերմինալ» ՓԲ ընկերության մաքսային հսկողության տարածքում զննության են ենթարկել թիվ 05100033/200920/0038086 տարանցման հայտարարագրով Վաչագան Քոթանջյանի անունով ՌԴ-ից ՀՀ ներմուծված ապրանքները ու հայտնաբերել, որ թիվ 05100033/200920/0038086 տարանցման հայտարարագրում նշված ապրանքներից բացի առկա է չհայտարարագրված 7586 կգ քաշով օգտագործված ասնձնական իրեր և 1160 կգ քաշով ասնձնական օգտագործման մեկ մեքենա, այսինքն՝ Պետրոս Պետրոսյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, 05100022/011020/0020038 տարանցման հայտարարագրերով, 26.09.2020թ-ի թիվ 356 մաքսային զննման ակտով:


Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ, 206 և 221-րդ հոդվածներով,

Ո Ր Ո Շ Ե Ց Ի՝

1. Պետրոս Լյովայի Պետրոսյանին (ծնված՝ 08.05.1964թ., ՀՀ, Արագածոտնի մարզ, գ.Օշական, 3-րդ նրբ, տուն 9, անձնագրի համարը՝ AT0498759 ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 1-ին պարբերությամբ և նրան տուգանել 50.000 դրամ: /վճարումը 900005024055 հաշվեհամարին, կող 19/:

2. Որոշման մասին հայտնել Պետրոս Պետրոսյանին՝ պարզաբանելով, որ ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ